



La scriptura surmirana Dominique Dosch ò scretg igl codesch Sindoria.



Sindoria, en debut gartagea

■ Durant igls 23avels Dis da litteratura a Domat è nia preschanto igl roman Sindoria, igl aprepem codesch dalla giova autoura surmirana Dominique Dosch. Igl codesch è fatg cun chito, compact ed ampernevel per tigneir ainta mang. La cuverta an en bloviolet intensiv è fitg decanta: sensom la pagina igl nom dall'autoura ed igl retel digl roman an bustabs elegants e bagn ligibels, giudem la pagina da vart sanestra l'indicaziun «Roman da fantasia» e da vart dretg ena gligna nova misteriosa tgi sclera flevlamaintg ena surfatscha d'ava.

Schi ena matta giova da 18 onns scriveva en roman da 412 paginas è chegl ena gronda prestaziun. Ma Dominique Dosch presta bler duple: Igl sies roman è bagn construia e mantegna la tensiun dall'antschatta anfignen la fegn. La protagonista Ramona, ena giova gimnasiasta, croda d'en'aventura an l'otra, stò schliier cuntinuadamaintg problems e misteris, per adegna puspe neir confrontada cun novas difficultads e novs angivigns. Dasperas rachinta Dominique Dosch an tgapetels alternonts otras istorgias tgi on ad amprenna vista magari nign connex tar l'istorgia principala da Ramona. Ma pi gliunsch tgi nign

aint igl codesch e pi clers tg'igls connex davaintan, scu en puzzle, noua tgi l'aggiunta da novs tocs renda igl maletg veapi cler e captivont.

L'indicaziun «Roman da fantasia» inditgescha, tg'igl roman da Dominique Dosch totga tigl gener litterar dalla «fantasy», en gener tgi lavoura cun monds imaginis, istorgias fictivas, forzas surnaturalas. Sindoria, igl mond parallel, immagino da Dominique Dosch, è bel, imposant, misterios, snuevel. Ma Sindoria ò er ena vart realistica, numnadamaintg ena moda da veiver arcaica sainza tecnica moderna. Ed alloura dattigl er anc igl noss mond real. Anzi, ena buna part digl roman è situada aint igl noss mond. La tensiun aint igl codesch sa dat lù, noua tgi capetan p. ex. fenomenoms surnaturalas aint igl noss mond, u noua tgi Ramona stò realisar tgi tot chels ageids tecnics digl noss mond na la stattan betg a disposiziun a Sindoria.

Sindoria è er en roman tgi tratta temas digl noss esser carstgang scu dabets, alcoholissem, angion, persecuziun, ma er suicid e perfign mordraritsch. Ramona vign confrontada directamaintg u indirectamaintg cun blers da chels problems. Ella reagescha cun reflexziun ed acziun e vign

uscheia a freida cun bleras difficultads. Alla fegn ans resta en maletg disfranztgea ed ap-profundo d'ena protagonista simpatica.

La destrucziun digl noss ambiat è en tema central digl roman, ma igl tema igl pi central am para l'amour. Aint igl roman Sindoria è l'amour emozionala e sensuala, d'ena vart desillusiononta, ma dall'otra vart fegna, madirada e fitg profunda.

La va ligia igl roman Sindoria cun grond gost e less recumandar chel debut gartagea ad egn e mintgign.

Igl roman Sindoria è cumparia tar la Chasa Editura Rumantscha a Coira e so neir retratg tar la Chasa Editura Rumantscha (www.chasaeditura.ch) u tar la Lia Rumantscha a Savognin (durant temp da biro u tenor cunvegientscha: 081 684 28 11).

Sonda proxima, ils 7 da december 2013, prele-gia Dominique Dosch ord ses codesch Sindoria a caschun dal di da las portas avertas tar la Lia Rumantscha a Savognin, a las 11h00 e 14.00.
Sindoria; Dominique Dosch; roman da fantasia rumantsch surmiran; 414 paginas; 35 francs; ISBN 978-3-905956-17-7
Chasa Editura Rumantscha, Cuira

Ursina Guldmond-Netzer

■ OPINIUNS

La fontauna da s. Placi a Sontget

Tut bufatg crodan las empremas scrottas da neiv sur praus e tetgs e plazzals. Gest aschi bufatg e tgeuamein svanescha la fontauna da s. Placi a Sontget (Mustér) e fa plaz ad in paradi. La fontauna ch'ei gest en quei liug in simbol per la historia da temps vargai, detga per biars antiquada, mo cumpart dall'identitad d'ina vischnauna e simbol dallas ragischs claustralas e communalas, ha piars sia muntada. La fontauna da s. Placi ei daventada in obstachel, in obstachel che sto far plaz als basegns e problems da nies temps modern. Tgei fan ins pia cun ina fontauna datier dalla via cantunala che vegn gest sanada, cun ina statueta e cun in sontget? Ins lai svanir quellas regurdien-schas sut igl catram e sut las empremas scrottas da neiv.

Cheu vegn Goethe endamen a mi che ha scret ina gada: Tgi che sa buca dar plaid e fatg da treis millennis, resta ella stgiradegna dall'ignoranza, po viver da di tier di.

Aschilunsch anavos sco quei che Goethe recamonda da seregurdar stuein nus gnanc ir buc. A nus tonschan ils davos 1400 onns. 1400 onns? Da tgei? Deplo-rablamein hai jeu emblidau tgei che claustra e vischnauna festiveschan l'auter onn. Forsa ei era mia memoria setschenta cun fontauna e statueta ella stgiradegna dil catram e sut la neiv.

Lisa Schmidt-Candinas, Mustér

■ NOVITADS WWW.RTR.CH

Scarnuz Grischun da la Surselva mida lieu

Quest onn po il Scarnuz Grischun festivar ses giubileum da 20 onns. Il Scarnuz Grischun è in satg da palpieri, il funs vegn em-pleni cun strom ed en il scarnuz giaschan products sco la turta da nuschs grischuna, schuppa da giutta, maschaidas da té, si-rups, confituras, liongias e chaschiel. Tut ils products vegnan producids da dunnas en il chantun Grischun. Dacurt ha il Scarnuz Grischun survegnì ina empustaziun gronda dad ina firma en il chantun da Tur-ritg. Igl n'è betg l'emprima empustaziun gronda. Cuzunt tar quellas empustaziuns saja quai impurtant dad esser organisà bain, dian Irma Caveng ed Astrid Duff che lavuran davent da l'entschatta per il Scarnuz Grischun. Ils products vegnan tuts fatgs a maun ed intgins products sco las maschaidas da té dovrann temp ed oravant tut il dretg temp per la raccolta.

L'auter onn datti anc ina gronda mi-dada tar il Scarnuz Grischun. La stizun che sa chattava enfin uss a Castrisch mida adressa ed è da nov da chasa a Sursaiassa. Vi dals products na sa mida nagut.

Sustegn per projects che spargnan electricitad

La confederaziun vul promover projects e programs che prevesan da spargnar energia electrica. Per la 5avla giada publitgescha el perquai ina concurrenza per la quala el metta a disposiziun 22 mil-liuns francs. Enfin il zercladur 2014 vegn lura decis tge projects che vegnan pro-movids. Tgi che dumonda sustegn per in project sto pudair cumprovar che quel na pudess betg vegnir realisà senza la con-tribuziun da promoziun.

Unfrendas da stalking duain vegnir protegidas meglier

Il cussegl federal vul protegger meglier unfrendas da stalking. Tuttina recumonda el da refusar ina moziun che pretendia mesiras immediatas. Gia il 2010 aveva il cussegl dals chantuns refusà ina moziun or dal cussegl federal. Quella aveva pre-tendi in artigel cunter «stalking» en il codesch da dretg penal. Il cussegl federal vul preschentar enfin la fin da l'auter onn in rapport d'evaluaziun.

Mintga terza persuna cun grev impediment dovra sustegn

En Svizra dovra mintga terza persuna cun in grev impediment sustegn. Parents ed enconuschents prestan qua tras la gronda part da l'agid, uschia communi-gescha il Departament federal per stati-stica areguard il di internaziunal da las persunas cun impediments. L'enquista mussa che 37% da las persunas cun grevs impediments dovrann agid da parents ed enconuschents, 4% fan diever da la pur-schida da la Spitex.

Industria svizra cun ulteriur schlantsch

En Svizra sa revegna l'industria vinavant. L'index da cumpra è creschì il november per passa dus sin 56 puncts, quai cumpareg-lià cun il mais avant. Uschia communi-gescha la Credit Suisse. Ils carnets d'or-dinaziun sajan s'emplenids vinavant. Areguard l'auta producziun vegnian las interpresas uschia ad augmentar vinavant lur dumber da persunal. L'index da cumpra vegn erui da la Credit Suisse ensemen cun l'associaziun dals cumpraders.

Tschains da referenza resta sin nivel bass da record

En Svizra resta il tschains da referenza per abitaziuns sin il nivel bass da 2%. Avant trais mais è il tschains vegnì sbassà per in quart punct. Cunquai ch'il tschains da referenza na mida betg na dettia era na-gina pretensiun da vulair auzar u sbassar il tschains da locaziun, quai scriva l'Uffizi federal d'abitaziuns. Dapi che la Svizra ha introducì il tschains da referenza è quel sa reducì cuntinuadamain da 3,5% il settember 2008 sin actualmain 2%.

La banca gronda vul cumprar enavos 11 emprests

La banca planisescha da cumprar enavos 11 emprests en ina valuta da 2,2 miliardas francs, quai ha communitgà l'UBS. La transacziun reduceschia la quota da cha-pital generala per 0,2% fin 0,5%. Sco consequenza da quai quinta la banca cun ina pitschna perdita, quella possian ins dentant compensar cun reducir ils custs da tschains.

ElCom sto anc ina giada giuditgar valita da la rait

Victoria parziala per las interpresas d'electricitad en la disputa cun la confede-razion davart la valita da la rait d'electricitad svizra. Il tribunal administrativ fede-ral ha approvà in recurs cunter la metoda da valitar la rait da l'ElCom, la commissiun d'electricitad federala. Sco quai ch'il tri-bunal scriva en sia decisiun sto l'ElCom anc ina giada giuditgar la valita da la rait. La decisiun n'è anc betg legala e po anc vegnir contestada avant il tribunal federal.

Biatlon: Staffetta rumantscha a Hochfilzen

Sonda proxima, ils 7 da december 2013 datti ina premiera mundiala en il sport da biatlon. Per l'emprima giada insum-ma datti en la cuppa mundiala da biatlon ina staffetta mo rumantscha. A Hochfil-zen en l'Austria en la staffetta da quatter giadas 6 kilometers partan las trais soras Selina, Elisa ed Aita Gasparin ensemen cun Irène Cadurisch. Tuttas quatter biat-letas discurren rumantsch.

Cunvegna cun il Cosovo

Cusseglie federal Alain Berset ha discutà cun ses collega d'uffizi dal Cosovo, Nenad Rasic, davart ina cunvegna pussaivla da l'assicuranza sociala. Dapi quatter onns na paja la Svizra naginas novas rentas d'AVS e d'invaliditad pli en il Cosovo, quai suenter ch'inquiziun cunter cugliunaders da renta probabels n'avevan betg gi success. Sco quai ch'il departament da l'intern communitgescha spetgia la Svizra tranter auter ch'er il Cosovo garanteschia il pajament da rentas socialas en l'exteriur.

Ulteriuras novitads



KEYSTONE